

Omèlie Arcivescovo mons. Alfredo Battisti: A.D. 1999

Omèlie pa l'inaugurazion de glesie di Visepente

24/01/1999



O soi tant content di vigni a gjoldi cun vualtris par tornà a consegnà al popul cristian de Visepente la glesie comedade. Si scugnive comedale parcèche a ere stade fate cul sudor dai vuestris vons. Chareciand i murs di cheste glesie al samee di sintì l'olme cjalde dai vuestris vecjos che l'han frequentade cun tante fede e han cjatat culì lis resons de lor sperance.

La peraule glesie a ul dì "comunità convocade" dal Signor risurit che ogni domenie al brame di incuintrà i siei discepui par crevà a lòr il pan de so Peraule te liturgje de peraule e il pan dal so Cuarp te liturgje eucaristiche

parcèche ancje no o podedin diventà pan crevat pai nestrìs fradis.

Cheste fieste mi da l'oportunitat di fevelaus so redut su la Liturgje de Peraule par tre resons:

Prin di dut o soi vignùt a di grassie come Vescul e ancje a nom di dute la Glesie furlane a pre Toni Beline vuestri plevan pa la grande e impegnative vore di voltà dute la Bibie par furlan. Mi samee di iessi quasi come il Vescul S. Cromazi di Aquilee ch'al mandave al so ami S. Jeroni a Betlem i bés par comprà lis bergaminis par voltà la Bibie "Vulgata" par latin. O sai ben che pre Toni al spiete so redut che la ricompense di cheste grande fadie a sedi che il so popul e dut il popul furlan al gjoldi di podè lèi e capì il Libri Eterno, il Libri dai Libris te so lenghe. Ma al è di iust di dì il nestrì agràt a Pre Toni par chest regal ch'a l'ha fat a la Glesie e al Popul furlan.

Second. La Bibie al è il libri plui impuartant par nudrì la fede dal popul cristian. La prime letture dal libri di Neemie (8,1-10) e dis che il predi Esdre al puartà la lec denant de semblee dai omps, des feminis e di duç chei ch'a ierin in stat di capì... Dute la int e iere intente a scoltà il libri de lec. Depuertas in esili a babilonie i giudeos deludùs e desperas e vevin pierdùt e dismenteat il libri de lec. Apene vierzùt il libri dut il popul al ievà in pìs. Esdre al benedì il Signòr, il Diu grant e dut il popul al rispundè: "Amen, amen" alçant lis mans. Po si butarin in geneglon cu la muse par tiere denant il Signòr... Neemie ch'al ere il governor, Esdre predi i diserin a dut il popul: "Chesta a je une sornade consacrade al Signòr vuetri Diu; no stait a vaì parcèche dut il popul al vaive biel ch'al scoltave lis peraulis de lec. Daspò Neemie ur disé:... "Chesta a jè une sornade consacrade al nestri Signòr; no stait a avilìsi, parcèche la gjonde dal Signòr e je la nestre fuarce". Cu la fuarce de Peraule di Diu e an scomencàt a ricostruì Gjerusalem e il templi.

O brami che il popul furlan, scoltant la peraule dal Signòr voltade pe prime volte te so lenghe, al sintis la stesse emozion e la stesse gjonde tal scuviargi che Diu al fevele propit vuè al so cùr. In dì di uè Esdra pal popul di Visepente al è il vuetri plevan ch'al sclarìs la Peraule dal Signor in nom e cu l'autoritàt di Crist. Gjesù al ha scomençiat, come che o vin sintùt tal Vanzeli; (Mt 4,17) a predicià disint: "Convertiisi, parcèche al è dongjie il ream dai cii. Il Signòr quant ch'al è comparìt ai undis in tant cha jerin a taule e che lu vevin viodùt resuscitat, ur disè: "Lait par dut il mont e predicjiait il Vanzeli a ogni creature" (Mc 16,15). Il predi al a il debit di predichià la Peraule di Diu; voaltris o veis il dovè di scoltà la Peraule di Diu.

Tierc. La seconde letture di Pieri Apuestul(2 Pt 1,16-20) nus ha dite: "O vin une conferme ancjemò plui grande de peraule dai profetis, che o faseis ben a tignile cont tant che un lampion ch'al lus tun luc dut scur, fintremai che nol criche il dì e tai vuestris curs no ieve la biele stele". Te presentazion de Bibie par furlan no Vescui de chesta region o vin scrit: "O sin oramai tal lunari di Diu e de storie dai omps, a une svoltade significative, impegnative, problematiches e stimolant. O stin scierant il secont milenari de ète cristiane e o stin viergint il libri miestereos da tierc milenari. In chest contest che

nus jemple di sperance, compagnade di une certe pore come in duç i granc' moments de storie, no podevin fa un regal plui grand, plui iust, plui util, plui induvinàt. Cu l'auguri che ancje lis gjienerazions c'a viodaran e operaran tal gnuf milenari a puedin gjoldi de stesse furtune di chès che li han precedudis: di iluminà la storie cu la lus de fede e di daj a la fede la concretece de storie. Di no separà la strade dal omp da la strade di Diu".

Ancje io, come Neemie us dis: "Chesta e jè una sornada consacrada al Signor; no stait a vai parceche la gionde dal Signor a je la vuestre fuarce.